

學 生 國 學 叢 書

夏敬觀選註

甲六五

楊誠齋詩

商務印書館發行

選註者 夏敬觀
主編者 王雲五

學 國
生 叢
書

楊

誠

齋

詩

商務印書館發行

中華民國二十九年九月初版

平

(84004.2)

學生國語叢書 楊誠齋詩一冊

每冊實價國幣陸角

外埠酌加運費匯費

選註者 夏敬觀

長沙南正路

主編人 王雲五

印刷所 商務印書館

各埠

發行所 商務印書館

版權所必究
翻印必究

(本書校對者 董雲文 王治)

導言

楊萬里集，卷帙繁重，自宋以後，絕無刊本，歷來所見，均係傳鈔，譌脫之多，難於考校。清吳之振等作宋詩鈔，謂初得黃春坊選本，又得樵李高氏所錄爲訂正；然集中佳篇，往往遺棄，尤怪其所選較餘人獨多，而未必皆爲佳作，推原其故，多由舊鈔誤字，疑不能明；但就其所可訂正者一一存之，是特存校訂於選集之中，有違選詩之本旨。余假得湘潭袁氏所藏郭麐兄弟手鈔精本，因與涵芬樓四部叢刊本互校，核正譌脫，過十之七八。郭鈔較叢刊本多七律一首，七絕二首，尤爲諸傳鈔本所未見。茲編選錄，因得棄短從長。

萬里詩善道人意中語，運用俚諺而不覺其俗，刻畫物態而不涉於纖，語淺意深，玩之極有餘味。且一生在行役中，故寫景詩尤多而奇。其下橫山灘頭望金華山詩云：『閉門覓句非詩法，只是征行始有詩。』二語正能自道其得力處。昔周必大跋其詩集，謂爲筆端有口，句中有眼，洵爲的評。

歷來論詩者，皆以隸屬於江西宗派，未爲知言也。其自序江湖集云：『予少作詩千餘篇，至紹興

壬午，盡焚之矣。大概江西體也。今所存曰江湖集者，蓋學后山半山及唐人者也。『自序荆溪集云：『予之詩，始學江西諸君子，既又學半山老人七字絕句，晚乃學絕句於唐人。學之愈力，作之愈寡。戊戌作詩，忽若有悟；於是謝唐人及王陳江西諸君子，皆不敢學，而後欣如也。』又跋徐恭仲省幹近詩云：『傳派傳宗我替羞，作家各自一風流，黃陳籬下休安腳，陶謝行前更出頭。』其高自位置，於此可見。然察其造詣之趨向，亦非過自誇大之言，命意絕高，駸駸欲達其指，各體均有獨到之處；固是能脫去依傍，憂憂自造者；特作文字功夫，初由何處入手，雖千變萬化，終不能脫盡始初所得之氣習，作者大率皆然。其不免仍餘江西派氣味，則誠有之，若直謂之江西派詩，則未之深究者之言也。

其詩寫景第一，詠物第二，均能闢前人未開之境。言情第三，議論敘事第四。若就各體評之，七絕第一，五古第二，七律第三，五律第四，七古第五，五絕第六。七絕詩尤能開派，作法極多，致力之深，正由於學王安石以進，追晚唐諸人而得；雖自謂戊戌以後棄唐人與半山不學，然觀其讀唐及半山詩絕句，作於戊戌，讀詩絕句，作於庚戌，答徐子材談絕句詩，作於壬子，（三詩均在選中，茲不錄，）而荆溪集之自序，則作於戊戌，距庚戌壬子已十三年，固始終未嘗棄也。

萬里詩編年次序，最爲清晰，分江湖、荆溪、西歸、南海、朝天、江西道院、朝天續集、江東、退休九集。方回瀛奎律髓，稱其每集必變一格，亦不盡然，祇退休集面貌改變，然精彩稍遜，已是暮年頽唐之筆也。

萬里是理學兼文學派，其師友交遊，爲張浚、張栻父子，胡銓、朱熹、陸九淵、張孝祥、尤袤、陸游、張鉉、姜夔、蕭德藻、范成大、周必大諸人。生平重氣節，厲清直之操。如言朱熹不當與唐仲友同罷，論儲君監國，不爲韓侂冑作南園記，作淳熙薦士錄，進說王淮以舉賢爲急務，皆足表見其行誼；但其見解，未有特別過人之處，觀其遊定林寺、半山寺詩，固是元祐諸公口吻，殆爲時代風氣所縛束也。

年譜

先生姓楊氏，名萬里，字廷秀，吉州吉水人。

宋高宗建炎元年丁未

先生生。

按本集乙未冬末郡中送春盤詩云：『新年五十奈老何。』則丙申年始爲五十歲。戊戌感秋詩云：『今年五十二。』丙午早朝垂拱殿晚出東省詩云：『明年六十一。』庚戌大兒長孺赴零陵簿示以雜言云：『老夫今年六十四。』乙丑秋衣詩云：『明年方八十。』先生實生於丁未年，八十而卒。宋史儒林傳，稱先生卒於開禧二年，年八十三，推算乃生於宣和甲辰，而與本集不符，實誤。

高宗紹興二十四年甲戌

二十八歲，中進士第，爲贛州司戶。

按官贛州司戶，未詳其在何年，姑列於中進士第下。宋官制三年秩滿，得調，以調零陵丞推之，當在紹興二十六年。

紹興三十年庚辰

調永州零陵丞，時張浚居永州，杜門謝客，先生三往不得見，以書力請，始見之，浚勉以誠意正心之學，先生服其教終身，迺名讀書之室曰誠齋。其後光宗嘗爲書誠齋二字，學者稱誠齋先生。

按宋史張浚傳，時以母喪將歸葬，會星變，求直言，浚謂金人數年間，勢決求釁用兵，而國家溺於宴安，蕩然無備，乃上疏極言，而大臣沈該、萬俟卨、湯思退等見之，謂敵初無釁，笑浚爲狂。臺諫湯鵬舉、凌哲，論浚歸蜀，恐動搖遠方，詔居永州，服除，落職以本官奉祠，三十一年春，有旨自便。宰輔表，三十一年十月，張浚復觀文殿大學士，判建康府。是先生之調永州零陵丞，必在庚辰，始得與浚相見，而與史所稱閉門謝客相合。江湖集始於壬午，是其永州之詩斷自壬午、癸未兩年始存，非壬午始至永也。

紹興三十二年壬午

始存詩，名之曰江湖集。是歲六月，帝傳位於太子，是爲孝宗。

孝宗隆興元年癸未

是歲春，先生秩滿，而代者未至，夏四月，始卸任，病傷寒，謁唐醫公亮，九日而愈，始離零陵，冬抵臨安，十二月，張俊同平章事，薦先生於朝。

按集中有負承零陵更盡而代者未至家君攜老幼先歸追送出城正值泥雨萬感驟集詩，在癸未上元詩以後；而在零陵所作，又有春晚卽事梅雨等詩；故知先生春初當秩滿，而以代者未至，遲至四月始卸任。以三年秩滿推之，則先生之到零陵承任，爲庚辰春無疑。

隆興二年甲申

除臨安府教授，未受任。正月，聞父病，旋吉水，丁父憂。

乾道元年乙酉

居喪。

乾道二年丙戌

是歲服除，秋至長沙，旋赴臨安。

乾道三年丁亥

抵臨安，秋還吉水。

按本集有還家秋夕喜雨詩，故知先生秋還吉水。

乾道四年戊子

在吉水。

按本集戊子正月六日雷雨感歎示壽仁子詩，人日詰朝從昌英叔出謁詩，均家居所作，故知先

生在吉水。

乾道五年己丑

在吉水。

按本集秋日晚望詩云：『不應閑散久，便去羨功名。』故知先生尙未除官。

乾道六年庚寅

除知隆興府奉新縣，春末抵任，最迫胥不入鄉，民逋賦者，揭其名市中，民謹趨之，賦不擾而足，縣以大治。會宰相虞允文、陳俊卿交薦於朝，十月，召爲國子博士，冬，卸知奉新縣任，赴臨安。

按隆興府，卽南昌，集中淺夏獨行奉新縣圃詩，在庚寅正月送羅季周遊學禾川詩後。詩云：『我來官下未多時，梅已黃深李綠肥。』故知先生是歲春末，始到任。宋史宰輔表，乾道六年，虞允文、陳俊卿並在相位，五月，陳俊卿罷相，則交薦先生，在五月以前。集中有中秋後一夕登清心閣詩，歸自豫章復過西山詩。詩云：『一眼苔花十里明，忽疑九月雪中行。』其後始列詔追供職學省，曉發鳴山驛詩，本集歷官告詞，國子博士告詞，注乾道六年十月六日，則知卸知奉新縣任，赴臨安，乃在冬間也。

乾道七年辛卯

春抵臨安，受國子博士任。三月，張說自明州觀察使知閣門事，兼樞密副都承旨，除簽書樞密院事。侍講張栻以論說故，出知袁州，先生抗疏留栻，又移虞允文書，以和同之說規之，栻雖不果留，而公論寔之。七月，遷太常博士。

按遷太常博士告詞，注乾道七年七月二十八日。

乾道八年壬辰

在臨安。九月，升太常丞，兼吏部右侍郎官。

按太常丞告詞，注乾道八年九月七日。

乾道九年癸巳

在臨安。四月，轉將作少監。

按將作少監告詞，注乾道九年四月二十八日。

淳熙元年甲午

正月，出知漳州，不赴任，旋吉水。

按本集有甲午出知漳州晚發船龍山暮宿桐廬詩。又據瓶中梅花長句自注，知在正月。

淳熙二年乙未

夏，改知常州，上章辭劇，丐祠，仍居吉水。

淳熙三年丙申

年五十歲，在吉水。

淳熙四年丁酉

四月十日，赴常州任，荆溪集自此始。

淳熙五年戊戌

年五十二歲，在知常州任。

淳熙六年己亥

正月，除提舉廣東常平茶鹽。三月，離常州。西歸集自此始。冬抵吉水。

按廣東提舉告詞，注淳熙六年正月二十一日。

淳熙七年庚子

正月，赴提舉廣東常平茶鹽任，南海集自此始。

淳熙八年辛丑

二月，除廣東提點刑獄。閏三月，受任。盜沈師犯南粵，帥師往平之。

按廣東提刑告詞，注淳熙八年二月五日，本集有閏三月二日發船廣州來歸亭下之官憲臺詩，故知其閏三月，始受提刑任。又按宋史本傳，於尋提舉廣東常平茶鹽下，卽接以盜沈師犯南粵，帥師往平之，孝宗稱之曰仁者之勇也。遂有大用意，就除提點刑獄，請於潮惠二州築外砦。潮以鎖賊之巢，惠以扼賊之路，今考本集督諸軍求盜梅州宿曹溪詩，羽檄召諸郡兵詩，平賊班師明發潮州詩，皆在赴提點刑獄任後，且提舉常平茶鹽，爲理財之官，不得有督兵平賊之責，是宋史先後倒列，誤也。羽檄召諸郡兵詩云：『閩盜宵窺粵，南兵曉盡東，軍聲動岩谷，旗影喜霜風，貔虎諸方集，櫓槍一笑空，區區鼠子輩，不足奏膚公。』正是沈師犯粵，帥兵往平之紀事詩。

淳熙九年壬寅

八月，加直祕閣。七月，丁母憂，解官居喪。

淳熙十年癸卯

居喪。

淳熙十一年甲辰

冬，服除，召爲尙左郎官。

按吏部員外郎告詞，缺注年月日，本集有仲冬，詔追造朝供尙書郎職舟行阻風青泥詩，故知在是年冬。朝天集自此始。

淳熙十二年乙巳

在臨安。五月，以地震應詔上書，除吏部郎中。宰相王淮問宰相先務者何事，先生對以人才。卽疏朱熹、袁樞、石起宗、祝懷、鄭僑、林枏、蔡戡、馬大同、鞏湘、京鏜、王回、劉堯夫、蕭德藻、章穎、霍篴、周必正、張貴謨、劉清之、湯邦彥、王公衮、莫漳、張默、孫逢吉、吳鑑、王謙、譚惟寅、但中庸、韓璧、李誦、余紹祖、葉元潯、廖德明、趙充夫、左昌時、胡思成、趙像之、孫逢辰、劉德秀、施淵然、祝禹圭、張泌、李大性、李大異、李大理、曾三復、曾三聘、徐徹、趙彥恂、王潛、虞公亮、陳謙、李沐、李耆俊、嚴昌裔、陳宇、盧宜之、蘇渭、鄭鄖、趙善佐、胡澥，六十人以獻。

吏部郎中告詞，注淳熙十二年五月二十三日。按宋史本傳云：王淮爲相，一日問曰：宰相先務者

何事？曰：人才。又問孰爲才？卽疏朱熹、袁樞以下六十人以獻。淮次第擢用之。王淮傳：時以荒政爲急，淮言朱熹學行篤實，擬除浙東提舉，以倡郡國，其後推賞。上曰：朱熹職事留意。淮言脩舉荒政，是行其所學，民實被惠，欲與進職。上曰：與升直徽猷閣。按王懋竑、朱子年譜：熹除爲浙東提舉，乃淳熙八年事。除直徽猷閣，乃九年事；蓋是後熹劾知台州 唐仲友，淮卽與熹不合。熹由此得祠。十二年，先生雖荐之，實未嘗進用，至十四年，先生上封事，薦熹久閒，可與監司，時周必大相，始除江南西路刑獄。本傳淮次第擢用一語，實未盡符事實也。且據本集淳熙薦士錄，在乙巳歲，爲先生長孺所記。是其事在擢太子侍讀前，而宋史本傳列擢侍讀後，亦誤。

淳熙十三年丙午

爲樞密院檢詳，擢太子侍讀，守右司郎中，遷左司郎中。

按檢詳告詞，注淳熙十三年正月十八日。右司郎中告詞，缺年月日。左司郎中告詞，注淳熙十三年十一月二十五日。又有朝請郎告詞，注淳熙十三年五月二十六日。稱勅朝散郎樞密院檢詳諸房文字兼太子侍讀，賜緋魚袋楊萬里。本集是歲有初夏清曉赴東宮講堂行經和寧門外賣

花市詩，故擢侍讀在是歲。宋史本傳云：東宮講官闕，帝親擢萬里爲侍讀官，僚以得端人相賀，他日讀陸宣公奏議等書，皆隨事規警，太子深敬之。

淳熙十四年丁未

年六十一歲。夏旱。先生復應詔疏四事以獻。十月，遷祕書少監。太上皇崩，孝宗欲行三年喪，十一月創議事堂，詔皇太子參決庶務，先生力諫，且上太子書，請辭勿居。

按祕書少監告詞，注淳熙十四年十月十一日。

淳熙十五年戊申

正月，皇太子初決庶務於議事堂。三月，翰林學士洪邁，議以呂頤浩、趙鼎、韓世忠、張俊，配饗高宗廟庭，先生上疏詆之，力言張浚當預，且謂邁無異指鹿爲馬。孝宗覽疏不悅，曰：萬里以朕爲何如主，由是以直祕閣出知筠州。四月，出臨安，回吉水。江西道院集自此始。冬，赴筠州任。

按本集有戊申四月九日得請初出國門宿釋伽寺詩，再復直祕閣告詞，注淳熙十六年五月四日。